

**Dženana Radončić\***

# **UMREŽAVANJE ZA BOLJI SISTEM CJELOŽIVOTNOG UČENJA KROZ ALUMNI ASOCIJACIJU PRAVNOG FAKULTETA U ZENICI**

Alumni asocijacija Pravnog fakulteta u Zenici je dobrovoljno udruženje u koje se učlanjuju svi koji su diplomirali, magistrirali ili doktorirali na Pravnom fakultetu Univerziteta u Zenici. Ciljevi ovakve asocijacije su prvenstveno uspostavljanje i održavanje trajne veze između Pravnog fakulteta u Zenici i studenata nakon završenog studija, povezivanje svih bivših studenata u Alumni asocijaciju kako bi se omogućila njihova međusobna saradnja, unapređenje rada Pravnog fakulteta kao obrazovne i naučno-istraživačke institucije, te razvijanje saradnje fakulteta sa privrednim društvima/preduzećima, institucijama i organizacijama u kojima su angažovani bivši studenti našeg fakulteta.

Suštinski, cilj je izgradnja mreže kontakata između studenata i nastavnog osoblja, kroz koju će se unapređivati kvalitet studija, njegova aktuelnost i prilagođenost postojećim tržišnim prilikama, ali i stvoriti platforma za naučnu i stručnu saradnju sadašnjih i bivših studenata, kao i nosilaca privrednih aktivnosti. Rukovodenim ovakvim ambicioznim, ali i ostvarivim ciljevima, dana 19.05.2014. godine u prostorijama Pravnog fakulteta u Zenici je održana osnivačka skupština Alumni asocijacije Pravnog fakulteta Univerziteta u Zenici, te su tom prilikom usvojeni osnivački akt i Statut Alumni asocijacije, te je izabrano rukovodstvo asocijacije.

Jedan od ciljeva Alumni asocijacije je bio uspostavljanje uspješnog Programa cjeloživotnog učenja, kojim se nastoji odgovoriti na sve brže tehničke i tehnološke promjene uslijed kojih stečena znanja, vještine i stavovi relativno brzo zastarijevaju. S tim ciljem je dana 12.07.2016. godine u prostorijama Pravnog fakulteta organizovan Okrugli stol alumnija na temu „Umrežavanje za bolji sistem cjeloživotnog učenja“, kako bi se dao dodatni podsticaj za obrazovne reforme i izmjene nastavnog progra-

\* Mr.sc., viša asistentica na Pravnom fakultetu Univerziteta u Zenici, predsjednica Alumni asocijacije.

ma na konceptu cjeloživotnog učenja, maksimiziranja ličnog potencijalna studenata i omogućavanje bolje zapošljivosti, odnosno konkurentnosti na tržištu rada. Kako članove alumnije čine svi svršenici bilo kojeg ciklusa studija, koji naravno dobrovoljno odluče da postanu članovi alumnija, to je bilo neophodno uspostavljanje operativnog radnog tijela, tzv. **Alumni centra**, koji trenutno broji 10-tak članova, što je optimalan broj s obzirom na operativnu ulogu tijela.

Efektivno funkcionisanje Alumni centra podrazumijeva organiziranje različitih programa i događaja kako bi se podigla razina obrazovanja studentske populacije na sva tri predviđena stepena, približili rezultati naučno-istraživačkog rada van-akademskoj zajednici, naročito privrednim subjektima, kao i uvećanju i kapitaliziranju potencijala Pravnog fakulteta u Zenici i ostvarivanju finansijskih sredstava nužnih za njegov razvoj.

Promocija programa cjeloživotnog učenja je ostvarena kroz pripreme i distribuiranje promotivnog štampognog materijala, te kroz kreiranje promotivno-informativnog video materijala i distribuiranje istog putem web stranice i profila na društvenim mrežama Fakulteta. Zahvaljujući promotivnim aktivnostima i zainteresovansoti studenata, 31.10.2016. godine održan je i drugi Okrugli stol, tokom kojeg su Alumni asocijacija i Alumni centar predstavljeni studentima postdiplomskog studija Pravnog fakulteta u Zenici.

Navedene aktivnosti su realizovane zahvaljujući sufinsaniranju projekata cjeloživotnog učenja od strane Federalnog ministarstva obrazovanja i nauke, čija podrška je bila ključna u početnoj fazi implementacije projekta, ako sve dosadašnje aktivnosti shvatimo kao početnu fazu, jer se radi o održivom konceptu koji nije vremenski ograničen.

Dalje planirane aktivnosti Alumni centra kao operativnog tijela Alumni asocijacije obuhvataju organizaciju okruglih stolova, seminara i konferencija, organizovanje programa obuke i treninga za članove Alumni asocijacije, umrežavanje bivših i sadašnjih studenata radi stručnog usavršavanja, pripravničkog rada i potencijalnog zaposlenja, kao i razmatranje ideje i koncepta Alumni časopisa. Budući da je članstvo u Alumni asocijaciji dobrovoljno i besplatno, to se ovom prilikom pozivaju svi svršeni studenti Pravnog fakulteta u Zenici (diplomanti, magistranti i doktoranti) da pristupe Alumni asocijaciji i da se aktivno uključe u rad Alumni centra. Redovnim članom Alumni asocijacije može se postati dobrovoljno, potpisivanjem pristupnice, čime se prihvataju ciljevi, prava i obaveze utvrđeni Statutom i odlukama Alumni asocijacije. Popunjenu prijavnicu je potrebno poslati na e-mail adresu: *alumni.prf.unze@gmail.com*